

摛藻堂四庫全書薈要

史部

欽定四庫全書叢書要

史部

唐書卷二百八

詳校官編修臣王天祿



欽定四庫全書薈要卷五千三百四十七

史部

唐書卷二百七

宋 端 明 殿 學 士 宋 邱 撰

列傳第一百三十二

宦者上

唐制內侍省官有內侍四內常侍六內謁者監內給事各十謁者十二典引十八寺伯寺人各六又有五局一曰掖廷主宮嬪簿最二曰宮闈扈門闈三曰奚官治宮

中疾病死喪四曰內僕主供帳燈燭五曰內府主中藏  
給納局有令有丞皆官者為之太宗詔內侍省不立三  
品官以內侍為之長階第四不任以事惟門閭守禦廷  
內掃除稟食而已武后時稍增其人至中宗黃衣乃二  
千員七品以上員外置千員然衣朱紫者尚少玄宗承  
平財用富足志大事奢不愛惜賞賜爵位開元天寶中  
宮嬪大率至四萬宦官黃衣以上三千員衣朱紫千餘  
人其稱旨者輒拜三品將軍列戟于門其在殿頭供奉

委任華重持節傳命光焰殷殷動四方所至郡縣奔走獻遺至萬計修功德市禽鳥一為之使猶且數千緝監軍持權節度反出其下於是甲舍名園上腴之田為中人所占者半京畿矣肅代庸弱倚為扞衛故輔國以尚父顯元振以援立奮朝恩以軍容重然猶未得常主兵也德宗懲艾泚賊故以左右神策天威等軍委宦者主之置護軍中尉中護軍分提禁兵是以威柄下遷政在官人舉手伸縮便有輕重至慄士奇材則養以為子巨

鎮彊藩則爭出我門小人之情猥險無顧藉又日夕侍天子狎則無威習則不疑故昏君蔽於所昵英主禍生所忽玄宗以遷崩憲敬以弑殞文以憂憤至昭而天下亡矣禍始開元極於天祐凶復參會黨類殲滅王室從而潰喪譬猶灼火攻蠹蠹盡木焚詎不哀哉跡其殘氣不剛柔情易遷襄則無上怖則生怨借之權則專為禍則迫而近緩相攻急相一此小人常勢也噫梟狐不神天與之昏末如亂何故取中葉以來宦人之大者猝之

篇

楊思勗羅州石城人本蘇氏冒所養姓少給事內侍省  
從玄宗討內難擢左監門衛將軍帝倚為爪牙開元初  
安南蠻渠梅叔鸞叛號黑帝舉三十二州之衆外結林  
邑真臘金隣等國據海南衆號四十萬思勗請行詔募  
首領子弟十萬與安南大都護光楚容繇馬援故道出  
不意賊駭貽不暇謀遂大敗封尸為京觀而還十二年  
五溪首領覃行章亂詔思勗為黔中招討使率兵六萬

往執行章斬首三萬級以功進輔國大將軍給祿俸防  
閣從封泰山進驃騎大將軍封號國公邕州封陵獠梁  
大海反破賓橫等州思勗又平之禽大海等三千人討  
斬支黨皆盡瀧州蠻陳行範自稱天子其下何游魯號  
定國大將軍馮璘南越王破州縣四十詔思勗發永道  
連三州兵淮南弩士十萬襲斬游魯璘於陣行範走盤  
遼諸洞思勗悉衆窮追生縛之阬其黨六萬獲馬金銀  
鉅萬計卒年八十餘思勗鷙忍敢殺戮所得俘必剥面

蕩腦褫髮皮以示人將士憚服莫敢視以是能立功內  
給事牛仙童納張守珪賂詔付思勗殺之思勗縛于格  
篋慘不可勝乃探心截手足剔肉以食肉盡乃得死楚  
客者樂安人後歷桂州都督致仕封松滋縣侯

高力士馮益曾孫也聖厯初嶺南討擊使李千里上二  
閻兒曰金剛曰力士武后以其彊悟敕給事左右坐累  
逐出之中人高延福養為子故冒其姓善武三思歲餘  
復得入禁中稟食司宮臺既壯長六尺五寸謹密善傳

詔令為宮闈丞玄宗在藩力士傾心附結已平韋氏乃  
啓屬內坊擢內給事先天中以誅蕭岑等功為右監門  
衛將軍知內侍省事於是四方奏請皆先省後進小事  
即專決雖洗沐未嘗出眠息殿帷中徼倖者願一見如  
天人然帝曰力士當上我寢乃安當是時宇文融李林  
甫蓋嘉運韋堅楊慎矜王鉢楊國忠安祿山安思順高  
仙芝等雖以才寵進然皆厚結力士故能踵至將相自  
餘承風附會不可計皆得所欲中人若黎敬仁林昭隱

尹鳳翔韓莊牛仙童劉奉廷王承恩張道斌李大宜宋  
光輝郭全邊令誠等並內供奉或外監節度軍修功德  
市鳥獸皆為之使使還所裒獲動巨萬計京師甲第池  
園良田美產占者什六寵與力士略等然悉藉力士左  
右輕重乃能然肅宗在東宮兄事力士它王公主呼為  
翁戚里諸家尊曰奢帝或不名而呼將軍力士幼與母  
麥相失後嶺南節度使得之瀘州迎還不復記識母曰  
曾有七黑子在否力士袒示之如言母出金環曰兒所

服者乃相持號慟帝為封越國夫人而追贈其父廣州  
大都督延福與妻及力士貴時故在侍養與麥均金吾  
大將軍程伯獻約力士為兄弟後麥亡伯獻縗絰受弔  
河間男子呂玄晤吏京師女國姝力士娶之玄晤擢刀  
筆史至少卿子弟仕皆王傅玄晤妻死中外贈謚送葬  
自第至墓車徒背相望不絕始李林甫牛仙客知帝憚  
幸東都而京師漕不給乃以賦粟助漕及用和糴法數  
年國用稍充帝齋大同殿力士侍帝曰我不出長安且

十年海內無事朕將吐納導引以天下事付林甫若何  
力士對曰天子順動古制也稅入有常則人不告勞今  
賦粟充漕臣恐國無旬月蓄和糴不止則私藏竭遂末  
者衆又天下柄不可假人威權既振孰敢議者帝不悅  
力士頓首自陳心狂易語謬當死帝為置酒左右呼萬  
歲由是還內宅不復事加累驃騎大將軍封渤海郡公  
於來庭坊建佛祠興寧坊立道士祠珍樓寶屋國貲所  
不逮鐘成力士宴公卿一扣鐘納禮錢十萬有安悅者

至二十扣其少亦不減十都北堰澧列五礮日餽三百斛直有袁思藝者帝亦愛幸然驕倨甚士大夫疏畏之而力士陰巧得人譽帝初置內侍省監二員秩三品以力士思藝為之帝幸蜀思藝遂臣賊而力士從帝進齊國公帝聞肅宗即位喜曰吾兒應天順人改元至德不忘孝乎尚何憂力士曰兩京失守生人流亡河南漢北為戰區天下痛心而陛下以為何憂臣不敢聞從上皇還進開府儀同三司實封戶五百上皇徙西內居十日

為李輔國所誣除籍長流巫州力士方逃瘞功臣閣下  
輔國以詔召力士趨至閣外遣內養授謫制因曰臣當  
死已久天子哀憐至今日願一見陛下顏色死不恨輔  
國不許寶應元年赦還見二帝遺詔北向哭歐血曰大  
行升遐不得攀梓宮死有餘恨慟而卒年七十九代宗  
以護衛先帝勞還其官贈揚州大都督陪葬泰陵初太  
子瑛廢武惠妃方嬖李林甫等皆屬壽王帝以肅宗長  
意未決居忽忽不食力士曰大家不食亦膳羞不具邪

帝曰爾我家老孺我何為而然力士曰嗣君未定邪推長而立孰敢爭帝曰爾言是也儲位遂定天寶中邊將爭立功帝嘗曰朕春秋高朝廷細務付宰相蕃夷不龔付諸將寧不暇邪對曰臣間至閣門見奏事者言雲南數喪師又北兵悍且彊陛下何以制之臣恐禍成不可禁其指蓋謂祿山帝曰卿勿言朕將圖之十三年秋大雨帝顧左右無人即曰天方災卿宜言之力士曰自陛下以權假宰相法令不行陰陽失度天下事庸可復安

臣之鉗口具時也帝不答明年祿山反力士善揣時事  
勢候相上下雖親昵至當覆敗不肯為救力故生平無  
顯顯大過議者頗恨宇文融以來權利相賊階天下之  
禍雖有補益弗相除云

程元振京兆三原人少以宦人直內侍省遷內射生使  
飛龍廄副使張皇后謀立越王元振見太子發其姦與  
李輔國助討難立太子是為代宗拜右監門衛將軍知  
內侍省事帝以藥子昂判元帥行軍司馬固辭乃以命

元振封保定縣侯再遷驃騎大將軍邠國公盡總禁兵不踰歲權震天下在輔國右凶決又過之軍中呼十郎王仲昇者初為淮西節度使與襄州張維瑾部將戰申州被執賊平元振薦為右羽林大將軍兼御史大夫將軍兼大夫由仲昇始裴冕與元振忤乃掎韓頴等罪貶施州來瑱守襄漢有功元振嘗諉屬不應因仲昇共誣殺瑱同華節度使李懷讓被構憂甚自殺素惡李光弼數媒蝎以疑之瑱等上將冕光弼元勲既誅斥或不自

省方帥繇是攜解廣德初吐蕃黨項內侵詔集天下兵無一士奔命者虜扣便橋帝蒼黃出居陝京師陷賊剽府庫焚閣街蕭然為空於是太常博士翰林待詔柳伉上疏曰大戎以數萬衆犯關度隴歷秦渭掠邠涇不血刃而入京師謀臣不奮一言武士不力一戰提卒叫呼劫宮闈焚陵寢此將帥叛陛下也自朝義之滅陛下以為智力所能故疏元功委近習日引月長以成大禍羣臣在廷無一犯顏回慮者此公卿叛陛下也陛下始出

都百姓填然奪府庫相殺戮此三輔叛陛下也自十月  
朔召諸道兵盡四十日無隻輪入關者此四方叛陛下  
也內外離叛雖一魚朝恩以陝郡戮力陛下獨能以此  
守社稷乎陛下以今日勢為安邪危邪若以為危豈得  
高枕不為天下計臣聞良醫療疾當病飲藥藥不當疾  
猶無益也陛下視今日病何繇至此乎天下之心乃恨  
陛下遠賢良任宦豎離間將相而幾于亡必欲存宗廟  
社稷獨斬元振首馳告天下悉出內使隸諸州獨留朝

恩備左右陛下持神策兵付大臣然後削尊號下詔引  
咎率德勵行屏嬪妃任將相若曰天下其許朕自新改  
過乎宜即慕士西與朝廷會若以朕惡未悛邪則帝王  
大器敢妨聖賢其聽天下所往如此而兵不至人不感  
天下不服請赤臣族以謝疏聞帝顧公議不與乃下詔  
盡削元振官爵放歸田里帝還元振自三原衣婦衣私  
入京師舍司農卿陳景詮家圖不軌御史劾按長流秦  
州景詮貶新興尉元振行至江陵死時又有駱奉先者

亦三原人歷右驍衛大將軍數從帝討伐尤見倖廣德初監僕固懷恩軍者奉先恃恩貪甚懷恩不平既而懼其譖遂叛事平擢奉先軍容使掌畿內兵權焰熾然永泰初以吐蕃數驚京師始城鄆以奉先為使悉毀縣外廬舍無尺椽累封江國公監鳳翔軍大厯末卒

魚朝恩瀘州瀘川人天寶末以品官給事黃門內陰黠善宣納詔令至德初監李光進軍京師平為三宮檢責使以左監門衛將軍知內侍省事九節度圍賊相州以

朝恩為觀軍容宣慰處置使觀軍容使自朝恩始史思  
明攻洛陽朝恩以神策兵屯陝洛陽陷思明長驅至陝  
石使子朝義為游軍肅宗詔銳兵十萬循渭而東以濟  
師朝恩按兵陝東使神策將衛伯玉與賊將康文景等  
戰敗之洛陽平徙屯汴州加開府儀同三司封馮翊郡  
公寶應中還屯陝代宗避吐蕃東幸衛兵離散朝恩悉  
軍奉迎華陰乘輿六師乃振帝德之更號天下觀軍容  
宣慰處置使專領神策軍賞賜不涯朝恩資小人恃功

岸忽無所憚僕固瑒攻絳州使姚良據溫誘回紇陷河陽朝恩遣李忠誠討瑒以霍文瑒監之王景峯討良王希遷監之敗瑒於萬泉生擒良高暉等引吐蕃入寇遣劉德信討斬之故朝恩因麾下數克獲竊以自高是時郭子儀有定天下功居功臣第一心媚之乘相州敗醜為詆譖肅宗不內其語然猶罷子儀兵留京師代宗立與程元振一口加毀帝未及寤子儀憂甚俄而吐蕃陷京師卒用其力王室再安故朝恩內慙乃勸帝徙洛陽

欲遠戎狄百僚在廷朝恩從十餘人持兵出曰虜數犯都甸欲幸洛云何宰相未對有近臣折曰敕使反耶今屯兵足以捍寇何遽脅天子棄宗廟為朝恩色沮而子儀亦謂不可乃止朝恩好引輕浮後生處門下講五經大義作文章謂才兼文武徼伺誤寵永泰中詔判國子監兼鴻臚禮賓內飛龍閑廄使封鄭國公始詣學詔宰相常參官六軍將軍悉集京兆設食內教坊出音樂俳倡侑燕大臣子弟二百人朱紫雜然為附學生列廡次

又賜錢千萬取子錢供秩飯每視學從神策兵數百京兆尹黎幹率錢勞從者一費數十萬而朝恩色常不足凡詔會羣臣計事朝恩怙貴誕辭折愧坐人出其上雖元載辯彊亦拱默唯禮部郎中相里造殿中侍御史李衍酬詰往返未始降屈朝恩不憚默衍以動造又謀將易執政以震朝廷乃會百官都堂且言宰相者和元氣輯羣生今水旱不時屯軍數十萬饋運因竭天子卧不安席宰相何以輔之不退避賢路默默尚可賴乎宰相

俛首坐皆失色造徒坐從之因曰陰陽不和五穀踴貴  
皆軍容事宰相何與哉且軍擎不散故天降之沴今京  
師無事六軍可相維鎮又屯十萬饋糧所以不足百司  
無稍食軍容為之宰相行文書而已何所歸罪朝恩拂  
衣去曰南衙朋黨且害我會釋菜執易升坐百官咸在  
言鼎有覆餗象以侵宰相王縉怒元載怡然朝恩曰怒  
者常情笑者不可測也載銜之未發朝恩有賜野觀沼  
勝爽表為佛祠為章敬太后薦福即后謚以名祠許之

於是用度侈浩公壞曲江諸館華清宮樓榭百司行署  
將相故第收其材佐興作費無慮萬億既數毀郭子儀  
不見聽乃遣盜發其先冢子儀詭辭自解以安衆疑久  
之讓判國子監鴻臚禮賓等使加內侍監徒封韓增實  
封百戶俄兼檢校國子監初神策都虞候劉希暹魁健  
能騎射最為朝恩昵信以太僕卿封交河郡王兵馬使  
王駕鶴獨謹厚亦封徐國公希暹諷朝恩置獄北軍陰  
縱惡少年橫捕富人付吏考訊因中以法錄貲產入之

軍皆誣服寃死故市人號入地牢又萬年吏賈明觀倚朝恩捕搏恣行積財鉅萬人無敢發其姦朝廷裁決朝恩或不預者輒怒曰天下事有不由我乎帝聞不喜養息令徽者尚幼為內給使服緣與同列爭忿歸白朝恩明日見帝曰臣之子位下願得金紫在班列上帝未答有司已奉紫服于前令徽稱謝帝笑曰小兒章服大稱滋不悅元載乃用左散騎常侍崔昭尹京兆厚以財結其黨皇甫溫周皓溫方屯陝而皓射生將自是朝恩隱

謀奧語悉為帝知希暹覺帝指密白朝恩朝恩稍懼然見帝接遇未衰故自安而潛計不軌帝遂倚載決除之懼不克載曰陛下第專屬臣必濟朝恩入殿常從武士百人自衛皓統之而溫握兵在外載乃徙鳳翔尹李抱玉節度山南西道以溫代節度鳳翔重其權實內溫以自助載又議析鳳翔之郿與京兆以鄠盩及鳳翔之虢寶雞與抱玉而以興平武功鳳翔之扶風天興與神策軍朝恩利其土地自封殖不知為虞也郭子儀密

白朝恩嘗結周智光為外應久領內兵不早圖變且大  
載留溫京師未即遣約與皓共誅朝恩謀定以聞帝曰  
善圖之勿反受禍方寒食宴禁中既罷將還營有詔留  
議事朝恩素肥每乘小車入宮省帝聞車聲危坐載守  
中書省朝恩至帝責其異圖朝恩自辨悖傲皓與左右  
禽縊之死年四十九外無知者帝隱之下詔罷觀軍容  
等使增實封戶六百內侍監如故外咸言既奉詔乃投  
縊云還尸於家賜錢六百萬以葬帝懼軍亂進劉希暹

王駕鶴並兼御史中丞又下詔慰曉將士獨希暹自知  
同惡言不遜駕鶴白發之遂賜死而賈明觀兼得幸於  
載故載奏隸江西使立功自贖路嗣恭榜殺之所厚禮  
部尚書禮儀使裴士淹戶部侍郎判度支第五琦皆坐  
貶

寶文場霍仙鳴者始並隸東宮事德宗未有名自魚朝  
恩死宦人不復典兵帝以禁衛盡委白志貞志貞多納  
富人金補軍止收其庸而身不在軍及涇師亂帝召近

衛無一人至者惟文場等率宦官及親王左右從至奉  
天帝逐志貞并左右軍付文場主之興元初詔監神策  
左廂兵馬以王希遷監右而馬有麟為左神策軍大將  
軍軍額由此始帝自山南還兩軍復完而帝忌宿將難  
制故詔文場仙鳴分總之廢天威軍入左右神策是時  
竇霍權震朝廷諸方節度大將多出其軍臺省要官走  
門下丐援引者足相躡衛士朱華以按摩得幸文場參  
慮補置索賊數萬緡而藩鎮贈遺累百鉅萬畧士妻女

無所憚詔殺之于軍其隆赫如此久之置護軍中尉中  
護軍各二員詔文場為左神策護軍中尉仙鳴為右焦  
希望為左神策中護軍張尚進為右中尉護軍自文場  
等始後仙鳴移病帝賜十馬令諸祠祈解後稍愈已而  
暴死帝疑左右進毒捕詰小使問狀誅數十人贈開府  
儀同三司以內常侍第五守亮代之文場擢累驃騎大  
將軍時監察御史崔遠行囚于軍吏為具酒食遠欲悅  
媚之故不拒文場劾奏詔流遠方文場年老致仕卒

其後楊志廉孫榮義為左右中尉招權驕肆與竇霍畧等帝晚節間民間訛語禁中事而北軍捕太學生何竦曹壽繫訊人情大懼司業武少儀上書有如罪不測願明示四方俄得釋是時宦官復盛矣希望者涇陽人歷明威將軍贈洪州都督尚進河東人歷忠武將軍贈開府儀同三司志廉弘農人歷左監門衛大將軍榮義涇陽人歷右武衛大將軍並贈揚州大都督

劉貞亮本俱氏名文珍冒所養宦父故改焉性忠彊識

義理平涼之盟在渾瑊軍中會虜變被執且西俄而得歸出監宣武軍自置親兵千人貞元末宦人領兵附順者益衆會順宗立海綯弗能朝惟李忠言牛美人侍美以帝旨付忠言忠言授之王叔文叔文與柳宗元等裁定然後下中書然未得縱欲遂奪神策兵以自彊即用范希朝為京西北禁軍都將收官者權而忠言素懦謹每見叔文與論事無敢異同唯貞亮乃與之爭又惡朋黨熾結因與中人劉光琦薛文珍尚衍解玉呂如全

等同勸帝立廣陵王為太子監國帝納其奏貞亮召學士衛次公鄭絅李程王涯至金鑾殿草定制詔太子已立盡逐叔文黨委政大臣議者美其忠高崇文討劉闢復為監軍初東川節度使李康為闢所破囚之崇文至闢歸康求雪貞亮劾以不拒賊斬之故以專悍見訾遷累右衛大將軍知內侍省事元和八年卒贈開府儀同三司憲宗之立貞亮為有功然終身無所寵假呂如全歷內侍省内常侍翰林使坐擅取樟材治第送東都獄

至閩鄉自殺又郭旻醉觸夜禁杖殺之五坊朱超晏王志忠縱鷹隼入民家榜二百奪職由是莫不憚畏

吐突承瓘字仁貞閩人也以黃門直東宮為掖廷局博士察察有才憲宗立擢累左監門將軍左神策護軍中尉左街功德使封薊國公王承宗叛承瓘揣帝銳征討因請行帝見其果敢自喜謂可任即詔承瓘為行營招討處置使以左右神策及河中河南浙西宣歙兵從之內寺伯宋惟澄曹進玉為館驛使自河南陝河陽惟澄

主之京華河中至太原進玉主之又詔內常侍劉國珍  
馬朝江分領易定幽滄等州糧料使於是諫官李廓許  
孟容李元素李夷簡呂元膺穆質孟簡獨孤郁段平仲  
白居易等衆對延英謂古無中人位大帥恐為四方笑  
帝乃更為招討宣慰使為御通化門慰其行承瓘御衆  
無它遠畧為盧從史侮狎踰年無功賴中詔擿使執從  
史而間遣人說承宗上書待罪乃詔班師還為中尉平  
仲劾承瓘輕謀弊賦損國威不斬首無以謝天下帝不

獲已罷為軍器莊宅使尋拜左衛上將軍知內侍省會  
劉希光納羽林大將軍孫璡錢二十萬緡求方鎮有詔  
賜死跡絆承瓘故令出監淮南軍纖人太子通事舍人  
李涉投陘言承瓘等寃狀於是孔戣知陘事閱其副不  
受即表其姦逐為峽州司倉參軍然帝於承瓘殊厚會  
李絳在翰林苦論其過故決遣之帝後欲還承瓘為罷  
絳宰相召為內弓箭庫使復左神策中尉惠昭太子薨  
承瓘請立禮王不從常飾一室藏所賜詔敕地生毛二

尺惡之躬糞除瘞之踰年帝崩穆宗銜前議殺之禁中  
敬宗時左神策中尉馬存亮論其寃詔許子士暉收葬  
宣宗時擢士暉右神策中尉是時諸道歲進閩兒號私  
白閩嶺最多後皆任事當時謂閩為中官區數咸通中  
杜宣欽為觀察使每歲時遣吏致祭其先時號敕使墓  
戶宣欽卒用羣官力徙宣欽觀察使

馬存亮字季明河中人元和時累擢左神策軍副使左  
監門衛將軍知內侍省事進左神策中尉軍所籍凡十

餘萬存亮料束尤精伍無罷士部無冗員敬宗初染署  
工張韶與卜者蘇玄明善玄明曰我嘗為子卜子當御  
殿食我與焉吾聞上晝夜獵出入無度可圖也韶每輸  
染材入官衛士不呵也乃陰結諸工百餘人匿兵車中  
若輸材者入右銀臺門約昏夜為變有詰其載者韶謂  
謀覺殺其人出兵大呼成列浴堂門閉時帝擊毬清思  
殿驚將幸右神策或曰賊入宮不知衆寡道遠可虞不  
如入左軍近且速從之初帝常寵右軍中尉梁守謙每

游幸兩軍角戲帝多欲右勝而左軍以為望至是存亮  
出迎捧帝足泣負而入以五百騎往迎二太后比至而  
賊已斬關入清思殿升御坐盜乘輿餘膳捐玄明偶食  
且曰如占玄明驚曰止此乎韶惡之悉以寶器賜其徒  
攻弓箭庫仗士拒之不勝存亮遣左神策大將軍康藝  
全將軍何文哲宋叔夜孟文亮右神策大將軍康志睦  
將軍李泳尚國忠率騎兵討賊日暮射韶及玄明皆死  
始賊入中人倉卒繇望仙門出奔內外不知行在遲明

盡捕亂黨左右軍清宮車駕還羣臣詣延英門見天子  
然至者不十一二坐賊所入闈不禁者數十人杖而不  
誅賜存亮實封戶二百梁守謙進開府儀同三司它論  
功賞有差存亮於一時功最高乃推委權勢求監淮南  
軍代還為內飛龍使太和中以右領軍衛上將軍致仕  
封岐國公卒贈揚州大都督存亮建事德宗更六朝資  
端畏善訓士始去禁衛衆皆泣唐世中人以忠謹稱者  
唯存亮西門季玄嚴遵美三人而已

遵美父季實為掖廷局博士大中時有宮人謀弑宣宗  
是夜季實直咸寧門下間變入射殺之明日帝勞曰非  
爾吾危不免擢北院副使終內樞密使遵美歷左軍容  
使嘗歎曰北司供奉官以跨衫給事今執笏過矣樞密  
使無廳事唯三楹舍藏書而已今堂狀帖黃決事此楊  
復恭奪宰相權之失也蓋疾時中官肆橫云後從昭宗  
遷鳳翔求致仕隱青城山年八十餘卒

仇士良字匡美循州興寧人順宗時得侍東宮憲宗嗣

位再遷內給事出監平盧鳳翔等軍嘗次敷水驛與御史元稹爭舍上廳擊傷稹中丞王播奏御史中使以先後至得正寢請如舊章帝不直稹斥其官元和大和間數任內外五坊使秋按鷹內畿所至邀吏供餉暴甚寇盜文宗與李訓欲殺王守澄以士良素與守澄隙故擢左神策軍中尉兼左街功德使使相糜肉已而訓謀悉逐中官士良悟其謀與右神策軍中尉魚弘志大盈庫使宋守義挾帝還宮王涯舒元輿已就縛士良肆脅辱

令自承反示牒于朝於時莫能辨其情皆謂誠反士良  
因縱兵捕無輕重悉斃兩軍公卿半空事平加特進右  
驍衛大將軍弘志右衛上將軍兼中尉守義右領軍衛  
上將軍李石輔政稜稜有風岸士良與論議數屈深忌  
之使賊刺石於親仁里馬逸而免石懼辭位士良益無  
憚澤潞劉從諫本與訓約誅鄭注及訓死憤士良得志  
乃上書言王涯等八人皆宿儒大臣願保富貴何苦而  
反今大戮所加已不可追而名曰逆賊含憤九泉不然

天下義夫節士畏禍伏身誰肯與陛下共治邪即以訓  
所移書遣部將陳季卿以聞季卿至會石遇盜京師擾  
疑不敢進從諫大怒殺季卿騰書于朝又言臣與訓誅  
注以注本官豎所提挈不使間知今四方共傳宰相欲  
除內官而兩軍中尉聞自救死妄相殺戮謂為反逆有  
如大臣挾無將之謀自宜執付有司安有縱俘劫橫尸  
關下哉陛下視不及聽未聞也且官人根黨蔓延在內  
臣欲面陳恐橫遭戮害謹脩封彊繕甲兵為陛下腹心

如姦臣難制誓以死清君側書間人人傳觀士良沮恐  
即進從諫檢校司徒欲弭其言從諫知可動復言臣所  
陳繫國大體可聽則宜洗宥涯等罪不可聽則賞不宜  
妄出安有死冤不申而生者荷祿固辭累上書暴指士  
良等罪帝雖不能去然倚其言差自彊自是鬱鬱不樂  
兩軍毬獵宴會絕矣開成四年苦風痺少間召宰相見  
延英退坐思政殿顧左右曰所直學士謂誰曰周墀也  
召至帝曰自爾所況朕何如主墀再拜曰臣不足以知

然天下言陛下堯舜主也帝曰所以問謂與周赧漢獻  
孰愈墀惶駭曰陛下之德成康文景未足比何自方二  
主哉帝曰赧獻受制彊臣今朕受制家奴自以不及遠  
矣因泣下墀伏地流涕後不復朝至大漸云始樞密使  
劉弘逸薛季稜宰相李珏楊嗣復謀奉太子監國士良  
與弘志議更立珏不從乃矯詔立頫王為皇太弟士良  
以兵奉迎而太子還為陳王初莊恪太子薨楊貴妃謀  
引安王不克武宗已立士良發其事勸帝除之以絕人

言故王妃皆死士良遷驃騎大將軍封楚國公弘志韓  
國公實封戶三百俄而珏嗣復罷去弘逸季稜誅矣帝  
明斷雖士良有援立功內實嫌之陽示尊寵李德裕得  
君士良愈恐會昌二年上尊號士良宣言宰相作赦書  
減禁軍縑糧芻菽以搖怨語兩軍曰審有是樓前可爭  
德裕以白帝命使者諭神策軍曰赦令自朕意宰相何  
豫爾渠敢是士乃帖然士良惶惑不自安明年進觀軍  
容使兼統左右軍以疾辭罷為內侍監知省事固請老

詔可尋卒賜揚州大都督士良之老中人舉送還第謝  
曰諸君善事天子能聽老夫語乎衆唯唯士良曰天子  
不可令閑暇暇必觀書見儒臣則又納諫智深慮遠減  
玩好省游幸吾屬恩且薄而權輕矣為諸君計莫若殖  
財貨盛鷹馬日以毬獵聲色蠱其心極侈靡使悅不知  
息則必斥經術闇外事萬機在我恩澤權力欲焉往哉  
衆再拜士良殺二王一妃四宰相貪酷二十餘年亦有  
術自將恩禮不衰云死之明年有發其家藏兵數千物

詔削官爵籍其家始士良弘志憤文宗與李訓謀屢欲  
廢帝崔慎由為翰林學士直夜未半有中使召入至秘  
殿見士良等坐堂上惟帳周密謂慎由曰上不豫已久  
自即位政令多荒闕皇太后有制更立嗣君學士當作  
詔慎由驚曰上高明之德在天下安可輕議慎由親族  
中表千人兄弟羣從且三百何可與覆族事雖死不承  
命士良等默然久乃啓後戶引至小殿帝在焉士良等  
歷階數帝過失帝俛首既而士良指帝曰不為學士不

得更生此乃送慎由出戒曰毋泄禍及爾宗慎由記其事藏箱枕間時人莫知將沒以授其子脩故脩惡中官終討除之蓋禍原於士良弘志云

楊復光閩人也本喬氏有武力少養於內常侍楊玄价家頗以節誼自奮玄价竒之宣宗時玄价監鹽州軍誣殺刺史劉臯臯有威名者世訟其冤稍遷左神策軍中尉諧去宰相楊收權寵震時復光有謀略累監諸鎮軍乾符初佐平盧節度使曾元裕擊賊王仙芝敗之招討

使宋威擊仙芝於江西復光在軍請判官吳彥宏約賊降仙芝遣將尚君長自縛如約威疾其功密請僖宗誅之故仙芝怨復引兵叛後天子寤威階禍罷之以兵與復光乃進禽徐唐莒王鐸為招討復光仍監軍鐸之棄荆南也山南東道節度使劉巨容定其地以忠武別將宋浩領荆南泰寧將段彥謨佐之復光父嘗監忠武軍而浩已為大將見復光少之不為禮彥謨亦耻居浩下遂有隙復光曰胡不殺之彥謨引標士擊殺浩復光以

客常滋假留後而奏浩罪薦彥謨為朗州刺史詔鄭紹業為荆南節度使以復光監忠武軍屯鄧州遏賊右衝帝西幸召紹業見行在復光更引彥謨為荆南節度使彥謨給行邊詣復光以黃金數百兩為謝其後忠武周岌受賊命嘗夜宴召復光左右曰彼既附賊必不利公不如毋行復光固往酒所語時事復光泣曰丈夫所感獨恩與義耳彼不顧恩義規利害何丈夫哉公奮匹夫封侯乃捐十八葉天子北面臣賊何恩義利害昧昧邪

岌流涕曰吾力不足陽合而陰離之故召公計因持杯  
盟曰有如酒即遣子守亮斬賊使于傳舍秦宗權據蔡  
州叛岌復光以忠武兵三千入見之宗權即遣部將王  
淑持兵萬人從復光定荆襄師次鄧淑逗遛復光斬之  
并其軍為八以鹿晏弘晉暉張造李師泰王建韓建等  
為之將進攻南陽賊將朱溫何勤逆戰大敗遂收鄧州  
追北藍橋會母喪班師俄起為天下兵馬都監總諸軍  
與東面招討使王重榮并力定關中朱溫守同州復光

遣使鑄諭溫以所部降方賊之彊重榮憂不知所出謂復光曰臣賊邪且負國拒戰邪則兵寡奈何復光曰李克用與我世共患難其為人奮不顧身比數召未即至者由太原道不通耳非忍禍者若諭上意彼宜必來重榮曰善白王鐸以詔使至太原克用兵乃出京師平以功加開府儀同三司同華制置使封弘農郡公賜號資忠輝武匡國平難功臣卒河中贈觀軍容使謚曰忠肅復光御下有恩軍中聞其死皆慟哭而麾下多立功者

諸子為將帥數十人守宗亦為忠武節度使

贊曰楚鄖公辛不敢讎君而忘父寃昭愍之世兩軍寵遇有厚薄而卒用存亮夷難功莫及者自古忠臣出於疏斥不用蓋多矣存亮豈通記書道理之人邪何其識君臣大誼明甚不尸大勞畏權處外又愈賢矣與夫書龍蛇之詩者何其小哉

唐書卷二百七

唐書卷二百七考證

官者序內謁者監內給事各十○舊書內謁者監六人  
內給事八人

寺伯寺人各六○舊書寺伯二人寺人六人

楊思勗傳擢左監門衛將軍○舊書累遷右監門衛將

軍

安南蠻渠梅叔鸞叛號黑帝○舊書作梅元成叛

馮璘南越王○本紀作馮仁智

高力士傳林昭隱○舊書作林招隱

朱光輝○舊書作朱文輝

程元振傳元振自三原衣婦衣私入京師○舊書作元

振服縗麻于車中入京城

吐突承璀傳又詔內常侍劉國珍馬朝江分領易定幽

滄等州糧料使○馬朝江舊書作馬江朝

唐書卷二百七考證

欽定四庫全書  
唐書卷五百三十四

史部

唐書卷二百八

宋 端 明 殿 學 士 宋 祁 撰

列傳第一百三十三

官者下

李輔國本名靜忠以閹奴為閑廄小兒貌儻陋略通書計事高力士年四十餘使主廄中簿最王鉉為使以典禾豆能檢擿耗欺馬以故肥薦之皇太子得侍東宮陳

玄禮等誅楊國忠輔國豫謀又勸太子分中軍趨朔方  
收河隴兵圖興復太子至靈武愈親近勸遂即位係天  
下心擢家令判元帥府行軍司馬肅宗稍稍任以肱膂  
事更名護國又改今名凡四方章奏軍符禁寶一委之  
輔國能隨事齷齪謹密取人主親信而內深賊未敢肆  
不啖葷時時為浮屠詭行人以為柔良不忌也帝還京  
師拜殿中監閑廄五坊宮苑營田裁接總監使兼隴右  
羣牧京畿鑄錢長春宮等使少府殿中二監封成國公

寶封戶五百宰相羣臣欲不時見天子皆因輔國以請  
乃得可常止銀臺門決事置察事廳兒數十人吏雖有  
秋毫過無不得得輒推訊州縣獄訟三司制勅有所捕  
逮流降皆私判臆處因稱制敕然未始間上也詔書下  
輔國署已乃施行羣臣無敢議出則介士三百人為衛  
貴幸至不敢斥官呼五郎李揆當國以子姓事之號五  
父帝為娶元擢女為妻擢以故為梁州長史弟兄皆位  
臺省李峴輔政叩頭言且亂國於是詔敕不繇中書出

者峴必審覆輔國不悅時太上皇居興慶宮帝自複道來起居太上皇亦間至大明宮或相逢道中帝命陳玄禮高力士王承恩魏悅王真公主常在太上皇左右黎園弟子日奏聲伎為娛樂輔國素微賤雖累貴力士等猶不為禮怨之欲立奇功自固初太上皇每置酒長慶樓南倚大道因裴回觀覽或父老過之皆拜舞乃去上元中劍南奏事吏過樓下因上謁太上皇賜之酒詔公主及如仙媛主之又召郭英乂王銑等飲賚子頗厚輔

國因妄言於帝曰太上皇居近市交通外人玄禮力士等將不利陛下六軍功臣反側不自安願徙太上皇入禁中帝不寤先時興慶宮有馬三百輔國矯詔取之裁留十馬太上皇謂力士曰吾兒用輔國謀不得終孝矣會帝屬疾輔國即詐言皇帝請太上皇按行宮中至睿武門射生官五百遮道太上皇驚幾墜馬問何為者輔國以甲騎數十馳奏曰陛下以興慶宮湫陋奉迎乘輿還宮中力士厲聲曰五十年太平天子輔國欲何事也

使下馬輔國失轡罵力士曰翁不解事斬一從者力士呼曰太上皇問將士各好在否將士納刀呼萬歲皆再拜力士復曰輔國可御太上皇馬輔國韁而走與力士對執轡還西內居甘露殿侍衛才數十皆延老太上皇執力士手曰微將軍朕且為兵死鬼左右皆流涕又曰興慶吾王地數以讓皇帝帝不受今之徙自吾志也俄而流承恩播州魏悅溱州如仙媛歸州公主居玉真觀更料後宮聲樂百餘更侍太上皇備灑掃詔萬安咸宜

二公主視服膳自是太上皇快快不豫至棄天下輔國  
以功遷兵部尚書南省視事使武士戎裝夾道陳跳丸  
舞劍百騎前驅御府設食太常備樂宰相羣臣畢會既  
得志乃厭然驕觴求宰相帝重違曰卿勲力何任不可  
但羣望未一如何輔國遂諷宰相裴冕使聯表薦已帝  
密擿蕭華使喻止冕張皇后數疾其頴帝寢疾太子監  
國后召太子將誅輔國及程元振太子不從更召越王  
究王圖之元振告輔國即伏兵凌霄門迎太子伺變是

夜捕二王及中人朱輝光馬英俊等囚之而殺后他殿  
代宗立輔國等以定策功愈跋扈至謂帝曰大家第坐  
宮中外事聽老奴處決帝矍然欲剪除而憚其握兵因  
尊為尚父事無大小率閼白羣臣出入皆先詣輔國輔  
國頗自安又冊進司空兼中書令實封戶八百未幾以  
左武衛大將軍彭體盈代為閼廐羣牧苑內營田五坊  
等使以右武衛大將軍藥子昂代判元帥行軍司馬賜  
輔國大第於外中外間其失勢舉相賀輔國始惘然憂

不知所出表乞解官有詔進封博陵郡王仍為司空尚  
父許朝朔望輔國欲入中書作謝表門者不內曰尚父  
罷宰相不可入輔國氣塞久乃曰老奴死罪事郎君不  
了請地下事先帝矣帝優辭諭遣有韓穎劉烜善步星  
乾元中待詔翰林穎位司天監烜起居舍人與輔國晤  
甚輔國領中書穎進祕書監烜中書舍人裴冕引為山  
陵使判官輔國罷俱流嶺南賜死自輔國徒太上皇天  
下疾之帝在東宮積不平既嗣位不欲顯戮遣俠者夜

刺殺之年五十九抵其首溷中殊右臂告泰陵然猶秘其事刻木代首以葬贈太傅謚曰醜後梓州刺史杜濟以武人為牙門將自言刺輔國者

王守澄者史亡所來元和中監徐州軍召還方憲宗喜方士說詔天下求其人宰相皇甫鏄左金吾將軍李道古等白見楊仁晝浮屠大通仁晝更姓名曰柳泌大通自言壽百五十歲有不死藥並待詔翰林號人田元佐言有秘方能化瓦礫為黃金詔除號令與董景珍李元

戢皆介泌大通薦于天子天子惑其說泌以金石進帝  
餌之躁甚數暴怒恚責左右踵得罪禁中累息帝自是  
不豫十五年罷元會羣臣危恐會義成劉悟來朝賜對  
麟德殿悟出曰上體平矣內外乃安是夜守澄與內常  
侍陳弘志弑帝於中和殿緣所餌以暴崩告天下乃與  
梁守謙韋元素等定冊立穆宗俄知樞密事文宗嗣位  
守澄有助力進拜驃騎大將軍帝疾元和逆罪久不討  
故以宋申錫為宰相謀因事除之不克更因其黨鄭注

李訓乘其鋩於是流楊承和於驩州韋元素象州遣中人劉忠諒追殺元素于武昌承和次公安賜死訓乃脅守澄以軍容使就第使內養齎耽賜死事秘時無知者贈揚州大都督其弟守涓自徐州監軍召還死於中牟劉克明亦亡所來得幸敬宗敬宗善擊毬於是陶元皓斬遂良趙士則李公定石定寬以毬工得見便殿內籍宣徽院或教坊然皆出神策隸卒或里閭惡少年帝與狎息殿中為戲樂四方間之爭以趨勇進于帝嘗閱角

祇三殿有碎首斷臂流血廷中帝歡甚厚賜之夜分罷  
所親近既皆凶不逞又小過必責辱自是怨望帝夜艾  
自捕狐狸為樂謂之打夜狐中人許遂振李少端魚志  
弘侍從不及皆削秩帝獵夜還與克明田務澄許文端  
石定寬蘇佐明王嘉憲閻惟直等二十有八人羣飲既  
酣帝更衣燭忽滅克明與佐明定寬弑帝更衣室矯詔  
召翰林學士路隋作詔書命絳王領軍國事明日下遺  
詔絳王即位克明等恃功將易置左右自引支黨顙兵

柄于時樞密使王守澄楊承和中尉梁守謙魏從簡與  
宰相裴度共迎江王發左右神策及六軍飛龍兵討之  
克明投井死出其尸戮之務澄等皆斬首以徇籍入家  
貲又殺其黨數十人始克明謀逆母禁不許文宗立嘉  
母忠賜錢千緡絹五百匹給婢二人

田令孜字仲則蜀人也本陳氏咸通時歷小馬坊使僖  
宗即位擢令孜左神策軍中尉是時西門匡範位右中  
尉世號東軍西軍帝沖駿喜鬪鷙走馬數幸六王宅興

慶池與諸王鬪鷺一鷺至五十萬錢與內園小兒尤昵  
狎倚寵暴橫始帝為王時與令孜同卧起至是以其知  
書能處事又帝資狂昏故政事一委之呼為父而荒酣  
無檢發左藏齊天諸庫金幣賜伎子歌兒者日鉅萬國  
用耗盡令孜語內園小兒尹希復王士成等勸帝籍京  
師兩市蕃旅華商寶貨舉送內庫使者監閥櫃坊茶閣  
有來訴者皆杖死京兆府令孜知帝不足憚則販鬻官  
爵除拜不待旨假賜緋紫不以聞百度崩弛內外垢玩

既所在盜起上下相掩匿帝不及知是時賢人無在者惟佞鄙沓貪相與備員偷安噤默而已左拾遺侯昌蒙不勝憤指言豎尹用權亂天下疏入賜死內侍省宰相盧攜素事令牧每建白必阿邑倡和初黃巢求廣州願罷兵攜欲寵高駢使有功不聽賊因又易置關東諸節度賊乘之陷東都令牧急歸罪攜奉帝西幸步出金光門至咸陽沙野軍十餘騎呼曰巢為陛下除姦臣乘輿今西秦中父老何望願還宮令牧叱之以羽林騎馳斬

即以羽林白馬戴帝晝夜馳舍駱谷時陳敬瑄方節度  
西川令牧兄也故請帝幸蜀有詔以令牧為十軍十二  
衛觀軍容制置左右神策護駕使至成都進左金吾衛  
上將軍兼判四衛事封晉國公帝見蜀陘陋稍鬱鬱日  
與賓侍博飲時時攘袂北望怡然流涕令牧伺間開釋  
呼萬歲帝為怡悅因盛稱鄭畋王鐸程宗楚李鋌敬瑄  
方并力賊不足虞帝曰善初成都募陳許兵三千服黃  
帽名黃頭軍以捍蠻帝至大勞將士扈從者已賜而不

及黃頭軍皆竊怨令牧令牧置酒會諸將以黃金樽行酒即賜之黃頭將郭琪不肯飲曰軍容能易偏惠均衆士誠大願也令牧曰君有功邪答曰戰党項薄契丹數十戰此琪之功令牧嘻怒曰知之密以酙注酒中琪飲已馳歸殺一婢吮血得解因夜燒營剽城邑敬瑄討敗之奔廣都遂走高駢所帝聞變與令牧保東城自守羣臣不得見左拾遺孟昭圖請對不召因上疏極諫君與臣一體相成安則同寧危則共難昔日西幸不告南

司故宰相御史中丞京兆尹悉碎于賊唯兩軍中尉以  
扈乘輿得全今百官之在者率冒重險出百死者也昨  
昔黃頭亂火照前殿陛下唯與令狐閉城自守不召宰  
相不謀羣臣欲入不得求對不許且天下者高祖太宗  
之天下非北司之天下陛下固九州天子非北司之天  
子北司豈悉忠於南司廷臣豈無用於敕使文宗時宮  
中災左右巡使不到皆被顯責安有天子播越而宰相  
無所豫羣司百官棄若路人已事誠不足諫而來者冀

可追也疏入令孜匿不奏矯詔貶昭圖嘉州司戶參軍使人沈于墓頤津初昭圖知正言必見害謂家隸曰大盜未殄宦豎離間君臣吾以諫為官不可坐觀覆亡疏入必死而能收吾骸乎隸許諾卒葬其尸朝廷痛之賊平令孜以王鐸為儒臣且無功而首謀召沙陀者楊復光也欲歸重北司故罷鐸都統以復光功第一又忌復光且逼已故薄其賞自謂帷幄決勝繫王室輕重出入倨甚會復光死大喜即罷復恭樞密使中人曹知憲者

富家子頗沈鷙賊在長安知憝以清濁二谷之人倚山  
為屯不屈賊陰教士卒變衣服言語與賊類者夜入長  
安攻賊營賊大懼帝聞賜金紫擢內常侍間帝將還因  
大言我且擁衆大散關下閱羣臣可歸者納之令收謂  
然密令王行瑜以邠州兵度嵯峨山襲殺其衆由是益  
自肆禁制天子不得有所主斷帝以其專語左右輒流  
涕復光部將鹿晏弘王建等以八都衆二萬取金洋等  
州進攻興元節度使牛頊奔龍州晏弘自為留後以建

及張造韓建等為部刺史帝還懼見討引兵走許州王建率義勇四軍迎帝西縣復以建及韓建等主之號隨駕五都令致以復光故纔授諸衛將軍皆養為子別募神策新軍以千人為都凡五十四都分左右為十軍統之又遣親信覘諸鎮不附己者以罪除徙養子匡祐宣慰河中王重榮厚為禮匡祐教甚舉軍怒重榮因數令致罪責其無禮監軍和解乃去匡祐還訴令致且勸圖之令致白以兩鹽池歸鹽鐵使即自兼兩池榷鹽使重

榮不奉詔表累令致十罪令致自將討重榮率邠寧朱  
政鳳翔李昌符合鄜延靈夏等兵凡三萬壁沙苑重榮  
說太原李克用連和克用上書請誅令致政帝和之不  
從大戰沙苑王師敗致走還邠州與昌符皆耻為令致  
用還與重榮合神策兵潰還略所過皆盡克用逼京師  
令致計窮乃焚坊市劫帝夜啓開遠門出奔自賊破長  
安火宮室舍廬十七後京兆王徽葺復粗完至是令致  
唱曰王重榮反命火宮城唯昭陽蓬萊二宮僅存王建

以義勇四軍扈帝夜亂牢水遂次陳倉克用還河中攻  
畏克用且逼與重榮連章請誅令牧而駐鳳翔令牧請  
帝幸興元帝不從令牧以兵入寢殿逼帝夜出羣臣無  
知者宰相蕭遘等皆不及從令牧勸興元節度使石君涉  
焚閣道絕帝西意遘惡令牧劫質天子生方鎮之難使  
攻進迎乘輿攻引兵追行在敗興鳳揚威軍帝次梁洋  
稍引而南攻兵及中營左右被剽戮者不勝計令牧懼  
人圖已蒙面以行使王建長劍五百清道囊傳國璽授

之次大散關道險澀帝危及難數矣分軍守靈壁亢追  
兵攻長驅躡帝帝以閣道毀走他道因甚枕王建膝且  
寐覺而飯僅能至興元攻重榮表誅令孜安慰羣臣詔  
以令孜為効南監軍使留不去重榮請幸河中令孜沮  
而止宰相遘率羣臣在鳳翔者表令孜頽國煽禍惑小  
人計交亂羣帥請誅之帝不及省且詔重榮餉糧十五  
萬斛給行在重榮以令孜在不奉命孜乃奉嗣襄王煴  
即偽位攻敗帝乃得還京師始帝入蜀諸王徒步以從

壽王至斜谷不能進令敎驅使前王謝足且拘得馬可濟令敎怒扶王彊之行王耻之及帝病中外屬壽王令敎入候帝曰陛下記臣否帝直視不能語令敎自署劒南監軍使閻拱宸奉鑾軍自衛晝夜馳入成都表解官求醫藥詔可俄削官爵長流儋州然猶依敎瑄不行王即位是為昭宗楊復恭代為觀軍容使出王建為壁州刺史建取利州自署防禦使因略定閬邛蜀黎雅等州詔即置永平軍拜建節度使令敎謀與建連衡亢朝廷

且曰吾子也書召之建喜將至復郤之建怒進圍成都  
令敎登城謝建曰老夫久相厚何見困答曰父子恩何  
敢忘顧父自絕朝廷苟改圖則父子如初令敎曰吾欲  
面計事建然許令敎夜負印節授建明日入成都囚令  
敎碧雞坊始右神策統軍宋文通為諸軍所疾令敎因  
事召見欲殺之既見乃欣然更養為子名彥賓即李茂  
貞也故獨上書雪其罪詔為湖南監軍凡二歲與敬瑄  
同日死臨刑裂帛為緼授行刑者曰吾嘗位十軍容殺

我庸有禮因教縊人法既死而色不變乾寧中詔復官爵

楊復恭字子恪本林氏子楊復光從兄也官父玄翼咸通中領樞密世為權家復恭略涉學術監諸鎮兵龐勛亂戰有功自河陽監軍入拜宣徽使擢樞密使黃巢盜京師令牧嶺威福斲喪天下中外莫敢亢惟復恭屢與爭得失令牧怒下遷飛龍使復恭乃卧疾藍田僖宗出居興元復為樞密使制置經略多更其手車駕還遂代

令孜為左神策中尉六軍十二衛觀軍容使封魏國公  
實戶八百賜號忠貞啓聖定國功臣帝崩定策立昭宗  
賜鐵券加金吾上將軍稍攘取朝政帝嘗曰朕不德爾  
援立我矣當減省侈長示天下我見故事尚衣上御服  
日一襲太常新曲日一解今可禁止復恭頓首稱善帝  
遂問游幸費對曰聞懿宗以來每行幸無慮用錢十萬  
金帛五車十部樂工五百犢車紅綱朱綱畫香車百乘  
諸衛士三千凡曲江溫湯若畋獵曰大行從宮中苑中

曰小行從帝乃詔類減半於是宰相韋昭度張濬杜讓能等為帝言大中故事抑宦官不假借帝亦稍厭復恭橫恣王瓌者惠安太后弟求節度使帝問復恭對曰產祿傾漢三思危唐后族不可封拜陛下誠愛瓌任以它職可也不宜假節外藩恐負勢顥地不可制帝乃止瓌聞怒甚至禁中見復恭詬辱之遂居中任事復恭不欲分已擢白為黔南節度使道興元而兄子守亮方領節度陰勒利州刺史覆瓌舟于江宗屬賓客皆死以舟自

敗聞帝知復恭謀繇是深銜之復恭以諸子為州刺史  
號外宅郎君又養子六百人監諸道軍天下威勢舉歸  
其門守立為天威軍使本胡弘立也勇武冠軍人畏之  
帝欲斥復恭懼為亂乃好謂曰卿家胡子安在吾欲令  
衛殿內復恭以守立見帝賜姓李名順節使掌六軍管  
鑰光寵甚既勢鈞遂與復恭爭恨相中傷暴發其私復  
恭常肩輿抵太極殿宰相對延英論叛臣事孔緝曰陛  
下左右有將反者帝矍然緝指復恭復恭曰臣豈負陛

下者緯曰復恭陛下家奴而肩輿至前殿廣樹不逞皆  
姓楊非反邪復恭曰欲收士心輔天子帝曰誠欲收士  
心胡不假李姓乎復恭無以對會緯出守江陵乃使人  
劫之長樂坡斬其旌節貲貯皆盡緯僅免復恭子守貞  
為龍劒節度使守忠洋州節度使皆自擅貢賦上書訕  
薄朝政大順二年罷復恭兵出為鳳翔監軍不肯行因  
丐致仕詔可遷上將軍賜几杖使者還遣腹心殺使者  
於道遁居商山俄入居昭化坊第第近玉山營而子守

信為軍使數省候出入或告父子且謀亂時順節遙領  
鎮海軍節度使同中書門下平章事詔與神策軍使李  
守節率衛兵攻復恭治殺使者罪帝御延喜樓須之家  
人拒戰守信亦率兵至昌化里陣以待會日入復恭與  
守信舉族出奔遂走興元順節已斥復恭則橫暴出入  
以兵從兩軍中尉劉景宣西門重遂察其意非常以狀  
聞有詔召順節輒以甲士三百人入至銀臺門呵止之  
景宣引順節坐殿廡部將嗣光審出斬之從者大譟出

延喜門剽永寧重盡夕止賈德晟與順節皆為天威軍使順節誅頗嗟憤重遂亦奏誅之於是鳳翔李茂貞邠州王行瑜華州韓建同州王行約秦州李茂莊同効守亮納叛臣請出兵討罪軍餉不仰度支茂貞請假山南招討使宦尹惜類執不可帝亦謂茂貞得山南必難制詔兩解之茂貞劾復恭自謂隋諸孫以恭帝禪唐故名復恭逆狀明白且請削守亮官爵遂擅與行瑜出討自號興元節度使詔宰相書慢悖不臣帝為下詔令茂貞

行瑜討之景福元年破其城復恭守亮守信奔閬州茂  
貞以子繼密守興元詔吏部尚書徐彥若為鳳翔節度  
使而以茂貞帥興元不拜請繼密為留後帝不得已授  
以節度使自是茂貞始彊大復恭與守亮等自閬州將  
北奔太原趨商山至乾元為韓建邏士所禽即斬復恭  
守信檻車送守亮京師梟首長安市茂貞上復恭與守  
亮書曰承天門者隋家舊業也兒但積粟訓兵何進奉  
為吾披荆榛立天子既得位乃廢定策國老奈負心門

生何門生謂天子也其不臣類此假子彥博奔太原收葬其尸李克用為申雪詔復官爵

劉季述者本微單稍顯於僖昭間擢累樞密使楊復恭之斥帝以西門重遂為右神策軍中尉觀軍容使時李茂貞得興元愈跋扈不軌宰相杜讓能與內樞密使李周謹及重遂謀誅之乃興師以嗣覃王戒丕為京西招討使神策大將軍李鍛副之茂貞引兵迎壁盩厔薄興平王師潰遂逼臨臯以陣暴言讓能等罪京師震恐帝

坐安福門斬重遂周謹以謝茂貞更以駱全瓘劉景宣  
代為兩中尉乾寧二年茂貞與王行瑜韓建以兵入朝  
李克用率師討茂貞次渭北同州節度使王行實奔京  
師謂景宣等曰沙陀十萬至矣請奉天子出幸避其鋒  
景宣方與茂貞睦故全瓘與鳳翔衛將閻主共脅帝狩  
岐王行實及景宣子繼晟縱火剽東市帝登承天門矢  
著樓闔帝懼暮出莎城士民從者數十萬至谷口人渴  
死十三夜為盜掠哭聲殷山徒駐石門茂貞恐乃殺全

瓘景宣及圭自解天子還京師以景務脩宋道弼代之俄專國宰相崔胤惡之徐彥若王搏懼禍不解稍抑胤以和北軍胤怒劾搏黨宦豎不忠罷去俄賜死流道弼驩州務脩愛州並死灞橋逐彥若干南海乃以季述王仲先為左右中尉疾胤尤甚時帝嗜酒怒責左右不常季述等愈自危先是王子病季述引內醫工車讓謝筠久不出季述等共白帝宮中不可妄處人帝不納詔著籍不禁由是疑帝與有謀乃外約朱全忠為兄弟遣從

子希正與汴邸官程巖謀廢帝會全忠遣天平節度副使李振上計京師巖因曰主上嚴急內外惴恐左軍中尉欲廢昏立明若何振曰百歲奴事二歲郎主常也亂國不義廢君不祥非吾敢聞希正大沮帝夜獵苑中醉殺侍女三人明日午漏上門不啓季述見肩曰宮中殆不測與仲先率王彥範薛齊偓李師度徐彥回總衛士千人毀關入謀所立未決是夜宮監竊取太子以入季述等因矯皇后令曰車讓謝筠勸上殺人禳塞災咎皆

大不道兩軍軍容知之今立皇太子以主社稷黎明陳  
兵廷中謂宰相曰上所為如此非社稷主今當以太子  
見羣臣即召百官署奏牘不得對季述衛皇太子至紫  
廷院左右軍及十道邸官俞潭程巖等詣思玄門請對  
士皆呼萬歲入思政殿遇者輒殺帝方坐乞巧樓見兵  
入驚墮於牀將走季述仲先持帝坐以所持鉗杖畫地  
責帝曰某日某事爾不從我罪一也至數十未止皇后  
出徧拜曰護大家勿使怖若有罪唯軍容議季述出百

官奏曰陛下督倦于勤願奉太子監國陛下自頤東宮  
帝曰昨與而等飲甚樂何至是后曰陛下如軍容語宮  
監液帝出思政殿后倡言曰軍容一心輔持請上養疾  
帝亦曰朕久疾令太子監國巖等皆呼萬歲后以傳國  
寶授季述就帝輦左右十餘人入囚少陽院季述液金  
以完鑄師虔以兵守太子即位於武德殿帝號太上皇  
皇后為太上皇后大赦天下東宮官屬三品賜爵一級  
四品以下一階天下為父後者爵一級羣臣加爵秩厚

賜欲媚附上下改東宮為問安宮季述等皆先誅戮以立威夜鞭笞晝出尸十輦凡有寵于帝悉榜殺之殺帝弟睦王師虔尤苛察左右出入搜索天子動靜輒白季述帝衣晝服夜浣食自竇進下至筆紙銅鐵疑作詔書兵器皆不與方寒公主嬪御無衾纊哀聞外廷肩告難於朱全忠使以兵除君側全忠封肩書與季述曰彼翻覆宜圖之季述以責肩肩曰姦人偽書從古有之必以為罪請誅不及族季述易之乃與盟肩謝全忠曰左軍

與肩盟不相害然僕歸心於公并送二侍兒全忠得書  
惠曰季述使我為兩面人自是始離季述子希度至汴  
言廢立本計又遣李奉本齎示太上皇誥全忠狐疑不  
決李振入見曰豎刁伊戾之亂以資霸者今閹奴幽劫  
天子公不討無以令諸侯乃囚希度奉本遣振至京師  
與肩謀是時季述欲盡誅百官乃弑帝挾天子令天下  
都將孫德昭董從實盜沒錢五千緡仲先衆辱之督其  
償株連甚衆肩間其不逞曰能殺兩中尉迎太上皇而

立大功何小罪足羞又遣客密告德昭割帶內蜜丸通  
意德昭邀別將周承誨期十二月晦伏士安福門待旦  
仲先乘肩輿造朝德昭等劫之斬東宮門外叩少陽院  
呼曰逆賊斬矣帝疑未信皇后曰可獻賊首德昭擲仲  
先頭以進宮人毀扉出御長樂門羣臣稱賀承誨馳入  
左軍執季述彥範至樓前脣先戒京兆尹鄭元規集萬  
人持大梃帝詰季述未已萬梃皆進二人同死梃下遂  
尸之兩軍支黨死者數十人中官奉太子遁入左軍收

傳國璽齊偓死井中出其尸斬之全忠檻送巖京師斬于市季述等夷三族以德昭檢校太保靜海軍節度使從實檢校司徒容管節度使並同中書門下平章事賜氏李曰繼昭曰彥弼承誨亦檢校司徒邕管節度使視宰相秩皆號扶傾濟難忠烈功臣圖形凌煙閣留宿衛凡十日乃休竭內庫珍寶賜之當時號三使相人臣無比初延英宰相奏事帝平可否樞密使立侍得與聞及出或矯上旨謂未然數改易撓權至是詔如大中故事

對廷英兩中尉先降樞密使候旨殿西宰相奏事已畢案前受事師虔請於屏風後錄宰相所奏帝以侵官不許下詔與徐彥回同誅

韓全誨張彥弘者皆不知所來並監鳳翔軍全誨入為內樞密使劉季述之誅崔胤陸扆見武德殿右廡胤曰自中人典兵王室愈亂臣請主神策左軍以扆主右則四方藩臣不敢謀昭宗意不決李茂貞語人曰崔胤奪軍權未及手志滅藩鎮矣帝聞召李繼昭等問以胤所

請奈何對曰臣世世在軍不間書生主衛兵且罪人已  
得持軍還北司便帝謂肖曰議者不同勿庸主軍乃以  
全誨為左神策中尉彥弘為右皆拜驃騎大將軍袁易  
簡周敬容為樞密使肖怒約京兆鄭元規遣人狙殺之  
不克全誨等知肖必除已乃已因諷茂貞留選士四千  
宿衛以李繼筠繼徽總之肖亦諷朱全忠內兵三千居  
南司以婁敬恩領之韓偓聞岐汴交戍數諫止肖肖曰  
兵不肯去耳偓曰初何為召邪肖不對議者知京師不

復安矣全誨彥弘及彥弼合勢恣暴中官倚以自驕帝不平有斥逐者皆不肯行肩固請盡誅之全誨彥弘見帝祈哀帝知左右漏言始詔囊封奏事官人更求麗妹知書者數十人侍帝為內訌由是肩計多露始張濬判度支楊復恭以軍貲乏奏假鹽麴一歲入以濟用度遂不復還至肩乃白度支財盡無以稟百官請如舊制全誨擿李繼筠訴軍中匱甚請割三司隸神策帝不能卻詔罷肩領鹽鐵肩銜之全誨等懼帝誅已與繼筠彥弼

繼筠交通謀亂帝問令狐渙渙請召肩及全誨等宴內  
殿和解之韓偓謂不如顯斥一二柄臣許餘人自新妄  
謀必息不然皆自疑禍且速雖和解之凶焰益肆帝乃  
止是時全忠并河中肩為急詔令入朝又詔書曰上反  
正公之力而鳳翔入朝引功自歸今若後至必先見討  
全忠得詔還汴悉師討全誨帝以為忠又欲其與茂貞  
同功即詔并力令肩詔二鎮書示帝意全忠取同州汴  
兵凡七萬威震關中全誨等泣奏曰全忠且至欲脅陛

下幸關東將謀傳禪臣不忍見高祖天下移它姓願至  
鳳翔合義兵討元惡帝未許方在乞巧樓全誨急即火  
其下帝降樓乃決西幸彥弼等以帝未即駕愈諱宮中  
禁索苛亟帝與后相視泣宮人私逃出都民崩沸或奔  
開化坊依肩第自固閉無留家鳳翔軍與左神策兵陣  
大衢長樂門外若丘墟然於是日南至百官不朝帝坐  
思政殿時彥弼先入鳳翔全誨逼帝出惟皇后諸王數  
百騎為衛帝繡袍塗金帽以右神策軍從寶天復元年

十一月壬子全誨等遂火宮城繼誨彥弼欲劫百官從天子李德昭等按兵衛之乃得免茂貞以帝居盩厔全忠取華州下令自釋曰吾被詔及得宰相書令入朝既至皆僞也逆臣全誨震驚天子脅乘輿出遷暴露草莽吾當入對言狀時公卿皆在長安數日不聞朝廷敕畫肩使王溥見全忠曰上猶在盩厔公宜亟進羣臣盧知猷等奏記全忠請西迎天子答曰進則似脅君退則負國然敢不勉肩率百官迎全忠灞橋入舍長安一昔而

西茂貞聞全忠至以帝入鳳翔從臣纔三四人全忠遣  
楊達裴鑄入鳳翔奉表天子汴部將康懷英襲破李繼  
昭于武功禽馘六千級全誣懼請救於李克用克用遺  
全忠書勸執崔胤洗海內謗全忠不答進屯鳳翔東偏  
茂貞登城喻語曰天子厭災于此讒人誤公來公當入  
觀全忠曰宦官脅驚乘輿吾以兵問罪迎上東還王非  
同謀者尚何所言明日圍鳳翔茂貞不出帝遣中人詔  
全忠班師不奉詔使者再往全忠聽命引兵攻邠州李

繼徽嬰城三日乃降質其妻復使繼徽守回壁三原  
與鄭元規至三原邀說全忠全忠亦自聞茂貞將戰徙  
營渭北據高原戰不勝全忠夜入盩厔拔藍田復屯三  
原時李克用攻慈隰救鳳翔全忠還河中克用部將李  
嗣昭戰數不利全忠取晉汾二州嗣昭遁還河東全忠  
曰此茂貞所倚今敗矣何能久乎脩復說全忠曰宜豎  
謀擁帝入蜀且泣全忠執其手乃定計迎天子會朱友  
寧敗岐兵于莫父居人皆入保全忠以精甲五萬與茂

貞決戰岐兵敗仆尸萬餘茂貞帳下八百人就縛乃嬰城自夏訖冬兵連不能解勝敗畧相償援軍十餘壁數為全忠擾襲不得進城中日困全忠由是取鳳廊坊成隴等州間劫鈔以佐軍餉故能不乏茂貞疑帝與全忠有密約增甲士守宮殿初帝至鳳翔有鴉數萬棲殿樹謂之神鴉俄而鴉不來人以為恐全誨等小人既勢窘更相怨疾不復遠慮時財用寘短帝輒所御膳賜全誨等三讓帝曰難得時欲同味耳茂貞食鮮美帝曰此後

池魚茂貞曰臣養魚以候天子聞者皆駭於是全忠軍  
攻東城焚橋廢戰部將李繼寵出降茂貞懼密圖誅中  
官以紓難先遺書曰禍亂之生全誨首之變興倉卒故  
迎天子至此且公未至懼它盜馮陵公既志輔社稷請  
奉乘輿還宮僕願以敝賦從全忠然許然軍稍薄城大  
誘者三岐軍皆投塹無鬪意帝召茂貞全誨彥弼及宰  
相蘇檢李繼岌繼忠議和已決中官復沮罷它日帝召  
茂貞等曰十六宅諸王日奏餒死者十三王公主夫人

皆間日食今又將竭奈何皆不敢對有衛士十餘人叩左銀臺門遮全誨罵曰破一州餓死者十萬徒以軍容數人耳全誨詣茂貞叩頭訴茂貞謝曰士伍亦何知復訴于帝帝不許李繼昭見全誨曰昔楊軍容破楊守亮一族今驃騎復破吾族乎罵之乃出降宦豎數傳援軍至皆相賀百姓笑曰給我乎是時全忠合四鎮兵十餘萬營壘相屬晝夜攻外兵詣守者曰劫天子賊守者亦詣外兵曰奪天子賊諸鎮見崔胤檄皆狐疑不出師唯

青州節度使王師範取兗州襲華州李克用攻晉州以  
為援全忠懼圍益急全誨等素謫險常為全忠脣所憚  
乃請先殺之以迎天子帝既惡宦人脅遷而茂貞又其  
黨全忠雖外示順終悖逆皆不可倚欲狩襄漢依趙匡  
凝然不得去乃定計歸全忠以緣近禍三年正月茂貞  
請遣使諭全忠軍詔崔構挾中人郭遵誨往既行又命  
宮人寵顏馳見全忠諭密旨乃以蔣玄暉入衛二日茂  
貞獨見至日旰全誨彥弘恨甚逮食不能捉匕自見勢

去計無所用垂頭喪氣帝召韓偓見東橫門執手涕泗  
帝曰今先去四大惡餘以次誅矣於是內養八輩候廷  
中授命每二輩以衛士十人取一首俄而全誨彥弘易  
簡敬容皆死即詔第五可範為左軍都尉王知古楊虔  
朗為樞密使知古領上院虔朗領下院繼筠繼誨彥弼  
皆伏誅茂貞取其輜重是夜誅內諸司使韋處廷等二  
十二人悉以首內布囊詔蔣玄暉學士薛貽矩送全忠  
曰是皆不肯使秉輿東者既斬之矣全忠大喜徧告軍

中以姚洎為岐汴通和使全忠詔茂貞書曰官者乘陴  
誓不已曰稟王旨是乎茂貞懼復誅小使李繼彝等十  
人於是開壘門全忠猶攻北壘帝遣寵顏賜御巾箱寶  
器使罷兵又捕殺中官七十人全忠亦使京兆誅黨與  
百餘人天子入全忠軍全忠泥首素服待罪客省傳呼  
徹三仗有詔釋全忠罪使朝服見全忠伏地泣曰老臣  
位將相勤王無狀使陛下及此臣之罪也帝亦嗚咽命  
韓偓起之解玉帶以賜召之食帝顧衛兵或有憤發者

因履係解目全忠為吾繫之全忠跪結履汗浹于背而  
左右莫敢動是夜帝三召皆辭朱友倫以兵衛帝李克  
用引軍去帝還京師脣全忠議盡誅第五可範等八百  
餘人於內侍省哀號之聲聞于路留單弱數十人備宮  
中灑掃脣以鎮人性謹厚即詔王鎔擇五十人為勅使  
內諸司宦官主領者皆罷於是追諸道監軍所在賜死  
其財產籍入之詔以中官脅遷狀及全忠迎秉輿本末  
告方鎮罷監軍院咸視國初故事以三十人為員衣黃

衣不得養子內諸司皆歸省若寺兩軍內外八鎮兵悉屬六軍全忠還汴州帝以第五可範等無辜頗悼之為丈以祭自是宣傳詔命皆以宮人始剴季述專廢立中人皆與聞帝反正誅季述及薛齊偓數族而已餘貸不問又悔之後稍稍誅夷羣官寢不安時帝懲幽辱能勵心庶政數召見羣臣問治道有志中興而全誨肩爭權外召彊臣劫本朝以相吞齧卒用關東軍窮討暴誅君側雖清而全忠勢遂張帝卒弑死唐室以亡其禍本於

全誨彥弘云

贊曰袁紹誅常侍以逞而曹操移漢崔丞相血軍容甘心焉而朱溫篡唐大抵假威柄于外以內攘姦人則大臣專王室卑矣漢唐相去五百歲產亂取亡猶蹈一轍非天所廢而人謀汨刺乃然邪

唐書卷二百八

唐書卷二百八考證

田令孜傳陳敬瑄方節度西川令孜兄也○舊書作令  
牧弟

唐書卷二百八考證

謹案卷二百七第三頁前八行五溪首領覃行章

按舊書章作璋

第十八頁後八行內寺伯宋惟澄曹進玉按舊書

進作淮

第十九頁後二行劉希光納羽林大將軍孫璡錢

按舊書光作先

卷二百八第十五頁前一行遂代令政為左神策

中尉按舊書作右軍中尉

欽定四庫全書





朝  
福  
錦  
宋  
臣  
嚴  
臣  
吉士  
庶  
校對官  
臣  
騰錄監生  
臣  
吉士  
庶  
總校官